


# **22nd Sydney Latin Summer School**



University of Sydney, January 18-22, 2016

**Level 4 vi**

**Instructor: Ian McLeod**

# Selections from Lucan, De Bello Civili, Book 1

## 1 - 7      The poet announces his theme, civil war, and lists its consequence

Bella per Emathios plus quam ciulia campos  
iusque datum sceleri canimus, populumque potentem  
in sua uictici conuersum uiscera dextra  
cognatasque acies, et rupto foedere regni  
certatum totis concussi uiribus orbis                    5  
in commune nefas, infestisque obuia signis  
signa, pares aquilas et pila minantia pilis.

## 33 - 66      The Invocation of Nero

quod si non aliam uenturo fata Neroni  
inuenere uiam magnoque aeterna parantur  
regna deis caelumque suo seruire Tonanti                    35  
non nisi saeuorum potuit post bella gigantum,  
iam nihil, o superi, querimur; scelera ipsa nefasque  
hac mercede placent. diros Pharsalia campos  
inpleat et Poeni saturentur sanguine manes,  
ultima funesta concurrent proelia Munda,                    40  
his, Caesar, Perusina fames Mutinaeque labores  
accendant fatis et quas premit aspera classes  
Leucas et ardentи seruilia bella sub Aetna,  
multum Roma tamen debet ciuilibus armis  
quod tibi res acta est. te, cum statione peracta                    45  
astra petes serus, praelati regia caeli  
excipiet gaudente polo: seu sceptra tenere  
seu te flammigeros Phoebi descendere currus  
telluremque nihil mutato sole timentem  
igne uago lustrare iuuet, tibi numine ab omni                    50  
cedetur, iurisque tui natura relinquet  
quis deus esse uelis, ubi regnum ponere mundi.  
sed neque in Arctoo sedem tibi legeris orbe  
nec polus auersi calidus qua uergitur Austri,

unde tuam uideas obliquo sidere Romam. 55  
 aetheris immensi partem si presseris unam,  
 sentiet axis onus. librati pondera caeli  
 orbe tene medio; pars aetheris illa sereni  
 tota uacet nullaeque obstent a Caesare nubes.  
 tum genus humanum positis sibi consulat armis 60  
 inque uicem gens omnis amet; pax missa per orbem  
 ferrea belligeri conpescat limina Iani.  
 sed mihi iam numen; nec, si te pectore uates  
 accipio, Cirrhaea uelim secreta mouentem  
 sollicitare deum Bacchumque auertere Nysa: 65  
 tu satis ad uires Romana in carmina dandas.

## 67 - 182 The causes of the war

### (a) 67 - 97 Fate and the Triumvirate

fert animus causas tantarum expromere rerum,  
 inmensumque aperitur opus, quid in arma furentem  
 inpulerit populum, quid pacem excusserit orbi.  
 inuida fatorum series summisque negatum 70  
 stare diu nimioque graues sub pondere lapsus  
 nec se Roma ferens. sic, cum conpage soluta  
 saecula tot mundi suprema coegerit hora  
 antiquum repetens iterum chaos, [omnia mixtis  
 sidera sideribus concurrent,] ignea pontum 75  
 astra petent, tellus extendere litora nolet  
 exutietque fretum, fratri contraria Phoebe  
 ibit et obliquum bigas agitare per orbem  
 indignata diem poscet sibi, totaque discors  
 machina diuolsi turbabit foedera mundi. 80  
 in se magna ruunt: laetis hunc numina rebus  
 crescendi posuere modum. nec gentibus ullis  
 commodat in populum terrae pelagique potentem  
 inuidiam Fortuna suam. tu causa malorum  
 facta tribus dominis communis, Roma, nec umquam 85

in turbam missi feralia foedera regni.  
 o male concordes nimiaque cupidine caeci,  
 quid miscere iuuat uires orbemque tenere  
 in medio? dum terra fretum terramque leuabit  
 aer et longi uoluent Titana labores 90  
 noxque diem caelo totidem per signa sequetur,  
 nulla fides regni sociis, omnisque potestas  
 inpatiens consortis erit. nec gentibus ullis  
 credite nec longe fatorum exempla petantur:  
 fraterno primi maduerunt sanguine muri. 95  
 nec pretium tanti tellus pontusque furoris  
 tunc erat: exiguum dominos commisit asylum.

**(b) 98 - 120 The deaths of Crassus and Julia**

temporis angusti mansit concordia discors  
 paxque fuit non sponte ducum; nam sola futuri  
 Crassus erat belli medius mora. qualiter undas 100  
 qui secat et geminum gracilis mare separat Isthmos  
 nec patitur conferre fretum, si terra recedat,  
 Ionium Aegaeo frangat mare, sic, ubi saeuia  
 arma ducum dirimens miserando funere Crassus  
 Assyrias Latio maculauit sanguine Carrhas,  
 Parthica Romanos soluerunt damna furores. 105  
 plus illa uobis acie, quam creditis, actum est,  
 Arsacidae: bellum uictis ciuile dedistis.  
 diuiditur ferro regnum, populique potentis,  
 quae mare, quae terras, quae totum possidet orbem,  
 non cepit fortuna duos. nam pignora iuncti 110  
 sanguinis et diro ferales omine taedas  
 abstulit ad manes Parcarum Iulia saeuia  
 intercepta manu. quod si tibi fata dedissent  
 maiores in luce moras, tu sola furentem  
 inde uirum poteras atque hinc retinere parentem 115  
 armatasque manus excusso iungere ferro,  
 ut generos saceris mediae iunxere Sabinae.

morte tua discussa fides bellumque mouere  
permissum ducibus. stimulus dedit aemula uirtus.

### (c) 120 - 157 Caesar and Pompey - the protagonists

tu, noua ne ueteres obscurent acta triumphos  
et uictis cedat piratica laurea Gallis,  
Magne, times; te iam series ususque laborum  
erigit inpatiensque loci fortuna secundi;  
nec quemquam iam ferre potest Caesarue priorem 125  
Pompeiusue parem. quis iustius induit arma  
scire nefas: magno se iudice quisque tuetur;  
uictrix causa deis placuit sed uicta Catoni.  
nec coiere pares. alter uergentibus annis  
in senium longoque togae tranquillior usu 130  
dedidicit iam pace ducem, famaeque petitor  
multa dare in uolgus, totus popularibus auris  
inpelli plausuque sui gaudere theatri,  
nec reparare nouas uires, multumque priori  
credere fortunae. stat magni nominis umbra, 135  
qualis frugifero quercus sublimis in agro  
exuuias ueteris populi sacrataque gestans  
dona ducum nec iam ualidis radicibus haerens  
pondere fixa suo est, nudosque per aera ramos  
effundens trunco, non frondibus, efficit umbram,  
et quamuis primo nutet casura sub Euro, 140  
tot circum siluae firmo se robore tollant,  
sola tamen colitur. sed non in Caesare tantum  
nomen erat nec fama ducis, sed nescia uirtus  
stare loco, solusque pudor non uincere bello.  
acer et indomitus, quo spes quoque ira uocasset, 145  
ferre manum et numquam temerando parcere ferro,  
successus urguere suos, instare fauori  
numinis, inpellens quidquid sibi summa petenti  
obstaret gaudensque uiam fecisse ruina,  
qualiter expressum uentis per nubila fulmen 150

aetheris impulsi sonitu mundique fragore  
emicuit ruptique diem populosque pauentes  
terruit obliqua praestringens lumina flamma:  
in sua templa fuit, nullaque exire uetante 155  
materia magnamque cadens magnamque reuertens  
dat stragem late sparsosque recolligit ignes.

**(d) 158 - 182 Moral decline at Rome**

hae ducibus causae; suberant sed publica belli  
semina, quae populos semper mersere potentis.  
namque, ut opes nimias mundo fortuna subacto 160  
intulit et rebus mores cessere secundis  
praedaque et hostiles luxum suasere rapinae,  
non auro tectisue modus, mensasque priores  
aspernata fames; cultus gestare decoros  
uix nuribus rapuere mares; fecunda uirorum 165  
paupertas fugitur totoque accersitur orbe  
quo gens quaeque perit; tum longos iungere fines  
agrorum, et quandam duro sulcata Camilli  
uomere et antiquos Curiorum passa ligones  
longa sub ignotis extendere rura colonis. 170  
non erat is populus quem pax tranquilla iuuaret,  
quem sua libertas inmotis pasceret armis.  
inde irae faciles et, quod suassisset egestas,  
uile nefas, magnumque decus ferroque petendum  
plus patria potuisse sua, mensuraque iuris 175  
uis erat: hinc leges et plebis scita coactae  
et cum consulibus turbantes iura tribuni;  
hinc rapti fasces pretio sectorque fauoris  
ipse sui populus letalisque ambitus urbi  
annua uenali referens certamina Campo; 180  
hinc usura uorax audumque in tempora fenus  
et concussa fides et multis utile bellum.

iam gelidas Caesar cursu superauerat Alpes  
 ingentisque animo motus bellumque futurum  
 cuperat. ut uentum est parui Rubiconis ad undas,185  
 ingens uisa duci patriae trepidantis imago  
 clara per obscuram uoltu maestissima noctem  
 turrigeru canos effundens uertice crines  
 caesarie lacera nudisque adstare lacertis  
 et gemitu permixta loqui: 'quo tenditis ultra?190  
 quo fertis mea signa, uiri? si iure uenitis,  
 si ciues, huc usque licet.' tum perculit horror  
 membra ducis, riguere comae gressumque coercens  
 languor in extrema tenuit uestigia ripa.  
 mox ait 'o magnae qui moenia prospicis urbis195  
 Tarpeia de rupe Tonans Phrygique penates  
 gentis Iuleae et rapti secreta Quirini  
 et residens celsa Latiaris Iuppiter Alba  
 Vestalesque foci summique o numinis instar  
 Roma, faue coeptis. non te furialibus armis200  
 persequor: en, adsum uictor terraque marique  
 Caesar, ubique tuus (liceat modo, nunc quoque) miles.  
 ille erit ille nocens, qui me tibi fecerit hostem.'  
 inde moras soluit belli tumidumque per amnem  
 signa tulit propere: sicut squalentibus aruis205  
 aestiferae Libyes uiso leo comminus hoste  
 subsedit dubius, totam dum colligit iram;  
 mox, ubi se saeuiae stimulauit uerbere caudae  
 erexitque iubam et uasto graue murmur hiatu  
 infremuit, tum torta leuis si lancea Mauri210  
 haereat aut latum subeant uenabula pectus,  
 per ferrum tanti securus uolneris exit.  
 fonte cadit modico paruisque inpellitur undis  
 puniceus Rubicon, cum feruida canduit aestas,  
 perque imas serpit ualles et Gallica certus215  
 limes ab Ausoniis disterminat arua colonis.

tum uires praebebat hiemps atque auxerat undas  
tertia iam grauido pluialis Cynthia cornu  
et madidis Euri resolutae flatibus Alpes.  
primus in obliquum sonipes opponitur amnem 220  
excepturus aquas; molli tum cetera rumpit  
turba uado faciles iam fracti fluminis undas.  
Caesar, ut aduersam superato gurgite ripam  
attigit, Hesperiae uetitis et constitit aruis,  
'hic' ait 'hic pacem temerataque iura relinquo; 225  
te, Fortuna, sequor. procul hinc iam foedera sunto;  
credidimus satis <his>, utendum est iudice bello.'

## 228 - 265 Caesar captures Ariminum

sic fatus noctis tenebris rapit agmina ductor  
inpiger, et torto Balearis uerbere fundae  
ocior et missa Parthi post terga sagitta, 230  
uicinumque minax inuadit Ariminum, et ignes  
solis Lucifero fugiebant astra relicto.  
iamque dies primos belli uisura tumultus  
exoritur; sed sponte deum, seu turbidus Auster  
inpulerat, maestam tenuerunt nubila lucem. 235  
constitit ut capto iussus deponere miles  
signa foro, stridor lituum clangorque tubarum  
non pia concinuit cum rauco classica cornu.  
rupta quies populi, stratisque excita iuuentus  
deripuit sacris adfixa penatibus arma 240  
quae pax longa dabat: nuda iam crate fluentis  
inuadunt clipeos curuataque cuspide pila  
et scabros nigrae morsu robiginis enses.  
ut notae fulsere aquilae Romanaque signa  
et celsus medio conspectus in agmine Caesar, 245  
deriguere metu, gelidos pauor occupat artus,  
et tacito mutos uoluunt in pectore questus.  
'o male uicinis haec moenia condita Gallis,  
o tristi damnata loco! pax alta per omnes

et tranquilla quies populos: nos praeda furentum  
primaque castra sumus. melius, Fortuna, dedisses  
orbe sub Eoo sedem gelidaque sub Arcto  
errantisque domos, Latii quam claustra tueri.  
nos primi Senonum motus Cimbrumque ruentem  
uidimus et Martem Libyes cursumque furoris  
Teutonici: quotiens Romam fortuna lacescit,  
hac iter est bellis.' gemitu sic quisque latenti,  
non ausus timuisse palam: uox nulla dolori  
credita, sed quantum, uolucres cum bruma coercet,  
rura silent, mediusque tacet sine murmure pontus,  
tanta quies. noctis gelidas lux soluerat umbras:  
ecce, faces belli dubiaeque in proelia menti  
urguentes addunt stimulos cunctasque pudoris  
rumpunt fata moras: iustos Fortuna laborat  
esse ducis motus et causas inuenit armis.

## **466 - 522 The reaction at Rome : Panic and Evacuation**

Caesar, ut immensa conlecto robore uires  
audendi maiora fidem fecere, per omnem  
spargitur Italiam uicinaque moenia complet.  
uana quoque ad ueros accessit fama timores  
inrupitque animos populi clademque futuram  
intulit et uelox properantis nuntia belli  
innumeris soluit falsa in praeconia linguas.  
est qui tauriferis ubi se Meuania campis  
explicat audaces ruere in certamina turmas  
adferat, et qua Nar Tiberino inlabitur amni  
barbaricas saeui discurrere Caesaris alas;  
ipsum omnes aquilas conlataque signa ferentem  
agmine non uno densisque incedere castris.  
nec qualem meminere uident: maiorque ferusque  
mentibus occurrit uictoque inmanior hoste.  
hunc inter Rhenum populos Albimque iacentes

finibus Arctois patriaque a sede reuolos  
pone sequi, iussamque feris a gentibus urbem  
Romano spectante rapi. sic quisque pauendo  
dat uires famae, nulloque auctore malorum  
quae finxere timent. 485

nec solum uolgas inani  
percussum terrore pauet, sed curia et ipsi  
sedibus exiluere patres, inuisaque belli  
consulibus fugiens mandat decreta senatus.  
tum, quae tuta petant et quae metuenda relinquant 490  
incerti, quo quemque fugae tulit impetus urgunt  
praecipitem populum, serieque haerentia longa  
agmina prorumpunt. credas aut tecta nefandas  
corripuisse faces aut iam quatiente ruina  
nutantes pendere domos, sic turba per urbem 495  
praecipi lymphata gradu, uelut unica rebus  
spes foret adflictis patrios excedere muros,  
inconsulta ruit. qualis, cum turbidus Auster  
reppulit a Libycis inmensum Syrtibus aequor  
fractaque ueliferi sonuerunt pondera mali, 500  
desilit in fluctus deserta puppe magister  
nauitaque et nondum sparsa conpage carinae  
naufragium sibi quisque facit, sic urbe relicta  
in bellum fugitur. nullum iam languidus aeuo  
eualuit reuocare parens coniunxue maritum 505  
fletibus, aut patrii, dubiae dum uota salutis  
conciperent, tenuere lares; nec limine quisquam  
haesit et extremo tunc forsitan urbis amatae  
plenus abit uisu: ruit inreuocabile uolgs.  
o faciles dare summa deos eademque tueri  
difficiles! urbem populis uictisque frequentem 510  
gentibus et generis, coeat si turba, capacem  
humani facilem uenturo Caesare praedam  
ignauae liquere manus. cum pressus ab hoste  
clauditur externis miles Romanus in oris, 515

effugit exiguo nocturna pericula uallo,  
et subitus rapti munimine caespitis agger  
praebet securos intra tentoria somnos:  
tu tantum auditio bellorum nomine, Roma,  
desereris; nox una tuis non credita muris. 520  
danda tamen uenia est tantorum danda pauorum:  
Pompeio fugiente timent.

### 673 - 695 The vision of the frenzied Matrona

terruerant satis haec pauidam praesagia plebem,  
sed maiora premunt. nam, qualis uertice Pindi  
Edonis Ogygio decurrit plena Lyaeo, 675  
tal is et attonitam rapitur matrona per urbem  
uocibus his prodens urgument pectora Phoebum:  
'quo feror, o Paean? qua me super aethera raptam  
constituis terra? uideo Pangaea niuosis  
cana iugis latosque Haemi sub rupe Philippos. 680  
quis furor hic, o Phoebe, doce, quo tela manusque  
Romanae miscent acies bellumque sine hoste est.  
quo diuersa feror? primos me ducis in ortus,  
qua mare Lagei mutatur gurgite Nili:  
hunc ego, fluminea deformis truncus harena 685  
qui iacet, agnosco. dubiam super aequora Syrtim  
arentemque feror Libyen, quo tristis Enyo  
transtulit Emathias acies. nunc desuper Alpis  
nubiferae colles atque aeriam Pyrenen  
abripimus. patriae sedes remeamus in urbis,  
in piaque in medio peraguntur bella senatu. 690  
consurgunt partes iterum, totumque per orbem  
rursus eo. noua da mihi cernere litora ponti  
telluremque nouam: uidi iam, Phoebe, Philippos.'  
haec ait, et lasso iacuit deserta furore.